

tikatika haere ana. I tino tapatahi tona whakaaro ki te hapai i nga mahi nunui a to tatou matua a Apirana.

Ko tana tamaiti ko Te Makarini he matamua no nga tamariki o te iwi Maori i tino akona ki nga matauranga hohonu o nga mahi ahuhenua. He tamaiti ngakau aroha, ngakau whakaaro nui whakaro hohonu. o nga mahi ahuhenua.

He tamaiti hoki i aroha nuitia e ona hoa katoa o te whanau "wiwi."

Haere e kui. Haere korua ko ta tatau tamaiti. Haere ki te Ariki Haere ki tou okiokinga. E kore rawa korua e ware-waretia. Ko te ha o a korua mahi tenei ra ka waiho hei mea ataahua ki runga ki o korua hapu maha.

### MIHI WIREMU.

No nga ra timatanga o Mei ka moe te whaea o te iwi Maori i te moenga roa. I mate atu ki tona kainga i Huakarere.

Ko ona tau i tona matenga kua tae ki te iwa tekau.

I rokohanga ahau ki Nelson i tona matenga, engari no te hokinga atu ki Heretaunga ka tae ahau ki te mau atu i te aroha o te iwi nui tonu ki to tatou koka. Kei te tangi katoa ana tamariki me ana mokopuna o Aotearoa me Te Waipounamu ki a ia. Kaore ano ahau i kite i tetahi tangata wahine, taane ranei, i neke atu te ngakau whakapono i tona.

Ihiihi ana te wairua o te tangata ina noho atu i tona taha, i te kite tonu atu i te nui o tona whakapono. i te kaha o tona aroha ki tona Ariki, me te mohio tonu atu kei runga tonu i a ia te Wairua Tapu e tau ana. Kanui te whakamihii o te whanau a Te Wiremu mo te taenga atu o nga wahine o Ngati Porou ki te toro atu i a ratou i te taenga mai nei ki Heretaunga ki te mau mai i nga mate o Reiri Ngata raua ko Te Makarini.

### HUKARERE WHARE KARAKIA

Kua roa te wa e whakahaeretia ana tenei korero kia hanga he Whare-karakia mo Hukarere. Hui katoa nga moni kua takoto £1,100. Apiti ki tenei, £100 te moni a te Thirty Thousand Club i kohi ai hei utu mo nga whakairo Maori hei whakauru ki roto i te whare. Ko te utu katoa mo te whare e oti ai tera e tae ki te £2,500. Kua puta taku inoi ki te Hahi pakeha kia arohatia mai hoki e ratou tenei take. Kaati, tenei hoki ahau e inoi nei ki taku iwi Maori kia whai-whakaaro mai ki tenei taonga nui hei painga mo nga tamariki wahine o te iwi nui tonu. Hei te 25 o nga ra o Hepetema ka tu te Hinota ki Nepia. Ko te tumanako kia tae mai te whakaaro a nga iwi mo tenei take i mua atu o te Hinota, kia waiho ai mo te ra o te Hinota ka whaka-takoto ai te kohatu o te kokonga. He aha ra he tohu whakamahara ma tatou ma te iwi nui tonu kia Mihi Wiremu me Reiri Ngata. Tokorua raua i tu nui tonu mai i